

UAFisawa

¹ Bulus gono kaduran Kristi Yisa nin yinnu Kutelle, udu kiti nale na ina fera nani bara Kutelle nan nya Afisus, ale na ina yinin nin Yisa Kristi.

² Na ubollu nin top Kutelle so nan ghinu unuzu kitime uchif bit a Cikilari bit Yisa Kristi.

³ Na issu Liru Kutelle nin Chiff in Cikilari bit Yisa Kristi. Amere na tinari vat uruhu nmari mongo na midi kitene kani nan nya Kristi.

⁴ Bara na Kutelle na fere nari alle na iyinna nin Kristi uworu a idutu sa uke in yi. Ana fere nari tinan yita lau sa ndinong nbun me.

⁵ Nan nya nsu Kutelle yiru nari atta nono me mun nan nya Yisa Kristi. Anan su nani nan nya lanzun mang nilemon na adinin su asu.

⁶ Vat nile imone iwasu, inan su liru Kutelle nan nya ngongong nbolu me ulle na ana filli nari nan nya kinayi me.

⁷⁻⁸ Kutanki

⁹ Kutelle na durso nari ushiri kidegen ka naki nyeshin nafo usu kibinayi me na aduro nan nya Kristi.

¹⁰ Asa kubin nmalzunu nshiri me nkullo aba munu imon kitene kani nin in yi ulele vat kiti kirum nan nya Kristi.

¹¹ In nan nya Kristi iwa fere nari uworsu nafo ushiri me na adin su imon vat nin kpilizu kibinayi me.

¹² Kutelleḡ na tinani tinan yita achine bara uzazinu ngongon Me, arikere ale na tiwa yarin uyinnu nin Kristi.

¹³ Kitin Kristiari iwa lanza ligbulang kidegen ulliru lai nin un tuchu mine kitin Kristi, ulle na anung na yinni mun tutun iyatca minu nin likawali nfip milau.

¹⁴ Uruhari likaran ngadu bit se tinin se uso nan nya kipin tigo Kutelleḡ bara liru ngongong me.

¹⁵ Bara nani un woru kubi ko na nwanlanza ubelle yinnu mine sa uyene nan nyan Cikilari Yisa, nin belle nsu vat nale na ina fere nani bara ame.

¹⁶ Na in sunna ugodo Kutelleḡ bara anughe nin yichu tisa mine nyan lira ning ba.

¹⁷ Ndin lira Kutelleḡ Cikilari Yisa Kristi, uchifi ngongong, ma niminu uruhu inyiru nin puzunu in yinnu me,

¹⁸ Ndin lire bara iyizi nibinayi mine ti kanang, tinang yinno inyari likara inciwu nibinayi bite. Ndi nlira inan yinnu inyarri ngbardang ngonbong gadu nan nya nalle na issosin lissosin me.

¹⁹ Iyaghari katin likaran gbardang me nin yiru me kiti nale iyinna, nafo na in gbardang likara katame din su.

²⁰ Lo likarere wasu katah nan nya Kristi na Kutelleḡ wa fiyghe kisek a sonkoghe nchara ulime me nan nya niti kitene kani.

²¹ Ubun nin vat tigoh, a udursuzun nbatinu, likara, usu ligo a kolome lissa lo na ina ni. Ana chewu Kristi ku na nko kuje chas ba, nin du kujin bun wang.

²² Kutelleḡ nani imon vat nabunu Kristi, amini

na tige asso liti nimon vat kuti nlira.

²³ Na kunnere kidowo me, ukullu mere din kulusu imon vat tibau ngangang.

2

¹ Anugh wa di, anan nkullari bara utazunu nin ntizu nalapi mine.

² Na iwa malu uchinu nafo ucin nko kube. Nafo usu nakara ngoh in yie. Nin ruhum nlinge na adi katuwa nin nono nsalin lanzu nliru.

³ Arike wang wan min di tisu nafo na nidowo bite di nin sun nsue. Nsu nimon kidowo nin kibinai, nan nya tiwa di nono tinana nayi nafo ngisinne.

⁴ Bara na Kutelleḡ unan konnayiari gbardang bara usu me na adimun bara arike.

⁵ Kubi ko na tiwa kuzu nanyan ntazunu bite, da a nin ghirik nanyan nlai upese ligowe nin Kristi-
kitin bolu Kutelleḡ na tizu minn.

⁶ Akuru a fia nari ligowe a taa nari tiso ligowe niti kitene kani nin Kristi Yisa.

⁷ Awa su nani bara bara kubi ncindak, aba dursu nari ngbardang nbolu me nin nayi ashau me in Kristi Yesu

⁸ Bara ubolu nayi ashau me, inase utuchu nanya nyinnu sa uyenu. Ullele na dak bara nnuzu nati biteri ba, ullele uffillu Kutelleḡ.

⁹ Na bara katuwa bit ba. Na umon uwa foo figiri ba.

¹⁰ Arike vat imon katuwa Kutelleḡ ari, awakeḡ nari nan nyan Kristi Yisa tisu nituwa nicine. kangah na Kutelleḡ wa keḡ ni nin uworsu bara tina su ucin nanye.

11 Nin nani lizinon anunghe wanadi awurmi nan nya kidowo. Ulle na idin yichu minu “anan kuchuru alumai” ulle na idin yichu inin anan katu kuchuru in nya kidowo.

12 Na nkoni kubi iwa kosu munu nin Kristi. Iwa idi amara nan nya nono Israila. Nin namara kitene nyinu nin nalikawali. Na uynu ni ile imun na idin bun ba. Nin sali Kutelle nanya inye.

13 Vat nin nani nene nan nya Nkristi Yisa anughe alle na iwadi piit nin Kutelle inalle na dak susut kupo Kutelle nan nya mmii Kristi.

14 Amere nsusut lisosin liman bite, ullenge na a wa ti ku Yahudawa nin ku wurmi iso unit urum, kidowo me, awa kala liyarin longo naliwa kosu nari nan nati bite.

15 Usso nafo, awa musuzu uduka nin nkaida anan saka ukke nanit apese nan nya nan awaba ane, ndak nin lisosin limang.

16 Awa su nani bara akele anite vat nan wabe iso kidowo kirum kiti Kutelle nan nya nnieu, ukull me na molu ivira kitik mine.

17 Yisa wadak ada belle ulirun lai nin top me kiti nalenge na iwadi pit, nin lisosin limang kiti nalenge na idi susut.

18 Bara kitin Yisa vat bite dimun libau lirim linse nfip milau kitin nchif bite.

19 Bara nani anug na iwadi awurmi na idu amara ba, nin nani anun adondon lisosin nan nyan nye nin nale na Kutelle na fere nani, allenge na ina piru nyan nono Kutelle.

20 Allenge na iwa ke nan nya litino nnono kadura nin nanan nliru nin nu Kutelle, ame Yisa Kristi ame litime wa so litala likout.

21 Nin Likara Yisa, vat makekewe na nankilari

me wase ligowe. Ita gbardang nafo kutien nlrnan na ina cheu kunin bara Chikilari.

²² Nanya me anun wang iwa kemunu liigowe nanya kiti lisosin Kutelle nanya nfip me.

3

¹ Bara nanere meng, Bulus, Kuchin in Kristi Yisa bara anughe awurmi.

² Andi ina lanza ubellen nyizu Kutelle nan nna min gegeme bara anughe.

³ Nafo amoro nyenju kitine kani na iwa dursai, kidegen ka na ki yeshin na nwan nyertin nin liru bāt.

⁴ Nan nya nani iwa yene iyerte umōti minu iyinin uyinu nighe uyeshin ki tenen Kiristi.

⁵ Kanga na iwa durso among aji ba, udu anit, vat nin nani iwa durso nono kata udu anit, vat nin nani iwadurso nono kata me nin nanan nlrnu nin nu allenge na iwa chiou nani kusar kurum nanya nfip Kutelle.

⁶ Inug awurumi adondon nlii ngadu a linuwana kidowo nin li, nonno kidowo adondon nkosu nan linuwana anan kasu likawali nan nya Kristi Yisa bara uliru nlai.

⁷ Bara nani nnaso kuchin bara ufilu nin bolu Kutelle na tina se bara likara me.

⁸ Meng ulle na ndi ubene chung nan nya na nan nibineyi nilau ina nii ulle ubolu Kutelle. Nbellu kadurau nse Kristi kiti nawurmi use ulle na ukatin likara nworo unit se.

⁹ Bara in duro anit kidegen ka na ki nyeshin ncizinu nburnu udu aji aji, ame ullenge na ana kye imon vat.

¹⁰ Nan nya na nan dortu Kutelle, nna duro uyiru ngan gan nin likara tigo kitene kane.

¹¹ Kitene nbelen nlai me ini na dak nan nya Kristi Yisa Cikilari bete.

¹² Nan nya Kristi tidini likara nibineyi ninyinnu me nan nya yinnu sa uyenu bite kitine me.

¹³ Bara nani ndin bellu minu na nidowo mine nwa kuba, bara uniu ule na meng diniu bara anughe, ngongong minere na di.

¹⁴ Kitene nanere, Ntumuno nin nalung nbun in Chief bite,

¹⁵ ulle na vat nanit nan nono mine nan nya kitene kani nin yii ullele nase ukę nin lisa kiti me.

¹⁶ Aba niminu nafo na use tigomedi, se likara nanya nfi nnu Kutelle, ulle na adi nnanyafe.

¹⁷ Bara Kristi na so nan nya mine nan nya yinnu sa uyenu, bara inan se litino inyisinu nin nakare nan nya nsuu.

¹⁸ Inan yinno, ligowe nin nalle na isosin bara Kutelle, impash, injengaran, impiit kitene kani, nin chancham nsuu Kristi din yizari.

¹⁹ Yinnon, ussu Kristi katin likara nworu unit yinin, bara inan se ukulunu likulung Kutelle.

²⁰ Nene kitime ullenge na awanya asu imon vat kitine nimon vat sa ukpiliu kibiineyi bit.

²¹ Uzazinu udu kitene nan nya kuti nlira nin Kristi Yesu udu aji aji vat sa ligang uso nanin.

4

¹ Bara nanin meng fa, nafo kucin ncikilari ndin fo minu nachara, sun ucin imusun nllenge na yicila munu.

² Nin toltinu liti ichang, Ayi ashew, iseru anit vat nin suu.

³ Suing ille imon na iba suu vat inan iso ligawe nan nya nbolu Kutelle nin lisosin limang.

⁴ Kidowo kirum, duku, infip milau mirum, nafo na iwa yicilla munu nin likara kibineyi nin tikibineyi nyicilu.

⁵ Tidin cikilariuwa rum, uyinnu sa uyenu urum, usul sunu ulau urum,

⁶ Kutelle kurum uchifing nvat, ame ulle na adi kitene vat, nan nya nvat a imon vat.

⁷ Ina ni kogha ku nan nya bite, udu diu gbardang nafo na Kristi na guchu.

⁸ Nafo na uliru Kutelle na belling, kubi ko na awa ghana kitene kani, apizira ligozin nancin na idi nanya licin asuu anit mafilzunu filzunu.

⁹ Ulle ullire pa, "Awa ghana kitene kani," din nnufi nworu, se akuru a pira nan nya nchachom kutina?

¹⁰ Ame ullenge na ana tolu nchanchom kitin amere ullenge na anakuru aghana kitene nitene anan kullo imon vat.

¹¹ Yisa wasu nafilzinu filzinu fone: among nono kadura, anan nliru nin nnu Kutelle, anan nuchu nbelling uliru Kutelle, anan libiya, nin nan dursuzu.

¹² Bara inan kulo nanin nin nimon katah Kutelle bara kye kidowon Kristi.

¹³ Udu kubi ko na tima se umunu nati nan nya nyinnu sa uyenu nin yina ngonoo Kutelle. Tiduru likulung nnit nafo allenge ikuno nin yiru ngono Kutelle.

¹⁴ Udina ni natiwa libuung lisosin nafo nono. Allenge na ufunu din killu kiti nu ghinu anan

yiru nbellu nliru nwultunu kiti.

¹⁵ Tima bellu kidegen nan nya nsuu me, tinau kuno nan nya mme na amere liteh, amere Kristi.

¹⁶ Ulle na nidowe nanan ndortine dofin kitine vat, nidowo mine munno tafat nan nati, naffo na kokome kubiri na ina fuloghe katane nan nya kitin nkunju kidowo, bare ukye nanit vat nan nya nsu.

¹⁷ Bara nanere imon ille nan belling munu, indin dursu minu nan nya ncikilari: na iwaa lawan ncine nafo awurme ba nan nya katah mine kalan.

¹⁸ Anan kpilizu nan nya nsirti. Alle na ina ina nutun nanin nan nya nlai kutelle bara utani ulle na udin nan nya mine nin gbas nibineyi mine.

¹⁹ Alle na itah gbas inani nnapka ati mine nan nya nimon izenzen nan nya nsuu nimon vat bara litime.

²⁰ Na nanere ina piziru uyinnu mbellen nKristi ba.

²¹ Andi ina lanza ikuru idursuzo minu ubelleng ise, nafo na kidegen di nan nya nKristi.

²² Sa iyinin sa inari kalan unit ukuse ullenge na udi nin lidu likuse, na idin kpilzinu unanuzu nanya nrusuzu kiti nin suu liti.

²³ Bara inan so apese nan nya nfulu ulau nibineye mine.

²⁴ Shonon unit upese, ullenge na Kutelle. Nakye ghe libo nfiu Kutelle nin lau kidegen.

²⁵ Bara nani, sunan kinu belleng atti kidigen, arik tigap kidowo kirumari.

²⁶ Assa ayi nnana munu na iwa ti kulapi ba, "Na iwa yinin uwui diu a iyita nin tinana naye

ba.”

²⁷ Bara iwa ni shitan ku kiti.

²⁸ Ullenge na adin suu likiri na awa kura asuu likire ba, nani na asuu katah katah kacine nin nachara me, anan se abuno unan diru.

²⁹ Na uliru unanza nwa nuchu tinu mine ba, nworu nani, tigulang ticine to na tiba kye among alle na idin pizure, anan lanze nanse ubolu Kutelle.

³⁰ Na iwa lanza ufunu alau Kutelle ayi ba, ullenge na ina yaci minu ninge udu lirin tuchu.

³¹ Nutunon vat ngbagbai nayi, tinan nayi tikhang, ughantizunu tiwui tinanza nin tizogo nutunong imon ine vat nin katahh kananzang.

³² Suuug ayi asheu nin nati mine, nin ni beneyi ni nese, ishauza nin na lapi nati, nafo na Kutelle nan nyan nKristi na shawa nin na lapi bite sa ubizu.

5

¹ Nafo nono nayi Kutelle.

² Cinan nafo ame, cinan nanya nsu nafo na Kristi nati a napka litime imon nkusu na dadu ananzang, imong kugya kuman, udu kiti Kutelle.

³ Unozu nan nawani nan nalilime, nin dinon a kuna niyizi na iwa se nanya mine ba, nanere cha kiti nanit alau Kutelle.

⁴ Sa imon inanzan, uliru tilala, timap liyakiti to nati chaun ba. Nworo minu sun uliru nin liburi libo.

⁵ Yinnon na umon unan nozu na nawani sa nalilime indinon, kunaniyizi, nin nan su nimon vat, aso ule na adin dortun ncil, na aba se kiti lisosin nanya kilari tigoh in Kristi nin Kutelle ba.

⁶ Na umon wa rusuzu minu nin tigulang hem ba. Bara ille imonere tinanayyi Kutelle ma tolu kitenen nonon salin lanzun liru.

⁷ Na iwa suzu ile imon na inung din suze ba.

⁸ Bara anung wang na di nanya nsirti, nene anung bdin kanaghari nanya in Cikilari. Cinan nafo nonon kanan.

⁹ Bara kumat nkanang ncineari nin lau a kidegen.

¹⁰ Ussu nimon icine nbun Kutelle.

¹¹ Na iwa munu achara nan ghinu kitin su katah nsirti ba. Nworu nani, puzunon nani kanang.

¹² Nnanzang nimon illenge na idin su nanya sirti na ichaun ubellu ba.

¹³ Nkanang din puzunu imon vat.

¹⁴ Bara nani ina woro, “unan moro fita, fita nanya nanan kul, Kristi ba punu nkanag me kiti me.”

¹⁵ Ndin bellu minu, cinan seng, na nafo alala ba, nafo ajijijn.

¹⁶ Sung katah nin kube, bara na allenge ayire ananzanghari.

¹⁷ Na iwa so alalan ba. Yinon ille imon na Kutelle nin suwe.

¹⁸ Na iwa son toro ba, bara asa mita unit deu, nworo nani na nfip Kutelle so nanya mine.

¹⁹ Iliku nin nati nanya nsen nin nalali nfip milau, isuzu avu nin liru nin nibinayi mine udu kitin Cikilari.

²⁰ Isuzu ugodiya ko kome kubi nanya nimon vat, nin lisan Cikilari Yisa Kristi udu uchife Kutelle.

²¹ Inonkuzo atimine nanyan lanzu fiu in Kristi.

²² Awani toltinon atimine kiti nales mine, nafo kitin Cikilari.

²³ Bara ules amere liti in wani, nafo Kristi amere liti kutin lira, amrere unan tuchu kidowo.

²⁴ Nafo na Kristiarin udyana nanan bi, nanere nalilime ma yitu adidya nawani mine.

²⁵ Anung Ales, tan usu nawani nafo na Kristi na ti usu nanan dortu me, ana litime bara inung.

²⁶ Bara anan ta nani iso lau. Ana kusu nani nin sulsunu ulau nanya nmyen ligulang.

²⁷ Anan nakpa anan dortu me kitime imon igongong, sa in dinong, sa ikpenu, sa imonimon nafon inin, na ina yita sa ndinon.

²⁸ Nafo na in belle, na ales ti usuu nawani mine nafo atimine. Ullenge na adin suu nwani me litimere adin suwe.

²⁹ Na umon sa nari kidowo me ba. Asa agyiza kinin imoli a kye kinin gegeme, nafo na Kristi din su nin nanan dortu me.

³⁰ Bara arik tigap kidowo mere.

³¹ Bara nani unit ba chinu uchiff me nin nameh amunu ninj wane, "inughe nabe ma so kidowo kirum."

³² Nkang kidegen liyenshin kidyawa kane, ndi bellu ubelle in Kristi ari nan nanan dortu me.

³³ Vat nin nani, kogha mine na ati usuu in wani me nafo litime, uwani tutung toltinon litime nbun less me.

6

¹ Nono toltinon atimine kiti nanan kumat mine nanya in Cikilari, nanere chaun.

² "Zazina uchiffe nin nafe" uni unare (udukan burnu nin likawali),

³ unan so gegeme uta ayiri gbardang nanya nyii.

⁴ Anung achiff, na iwa fiza nono mine ayi ba. Nworu nani, boron nanin iyizi imin nani nanya libau in Cikalari.

⁵ Acin, dortong uliru nan cinilari mine nyii ulele, nin toltunu nati nching nin ketuzu, nin kibinayi kirum nafo Kristi.

⁶ Na bara inan ponani nibinayi in yenju niyizi ba. Nafo acin in Kristi litime, nsu nile imon na Kutelle dinin suwe nanya nibinayi mine.

⁷ Isu nani katah nin nayi abo nafo idin su Cikalari mun na anit ba.

⁸ Lizinon katah kacine kanga na kogha nsu, amase uwesu tinonto kitin Cikalari, sa kuchin sa gono kilari.

⁹ Anung an Cinilari nyii, sun achin mine nani, na iwa ziu nani ba, nin yirung woro ame ule na adi Cikalari mine nin unmine adi kitene kani, na adin feru ba.

¹⁰ Nmalzune, yisinang nanyan Cikalari nin ligang likara mine.

¹¹ Shonon imon likum Kutelle vat, inan se imon in kesuzu tikancin shitan.

¹² Bara na likum bite lin kidowaei nin mii ba. Likum bite tidin su nanan tighoh nin nanan nakara, a anan tizu nanit isu imong inanzan, isirne nanyan yii ulele, nin nan rusuzu kiti nin fip minanzang nitene nani.

¹³ Bara nani shonon imon likum Kutelle vat, inan yinno uyisinu gagang nanya kubi kuanzang kone, isu imele na iba yinnu usue ina yisina nin nakara

¹⁴ Yisinan nin nakara, itechu imon techu

natino icine nin nimon kesu figiri ilau.

¹⁵ Shonon akpatak alenge na aba bunu minu ibellu uliru lisosin lisheu.

¹⁶ Kokome kubi, yirang imon in kesun yinnu sa uyenu, inare ma kesuzu katah kananzang nin tiyop nlan shitan.

¹⁷ Yirang kiti fikoro kin tuchu nin litan kusan-gali lidya lin funu ulau, unighere uliru Kutelle.

¹⁸ Nan nya sun lira nin fwag nachara, kokome kubi nannya nfunu ulau, ichisu iyizi nkawu nin sho nati, a nlira bara alenge na isosin bara Kutelle.

¹⁹ Isu nlira bara meng, bara kadura kanga na iba nii, asa in puno unu, nbelle imon ile na iyeshin nliru Kutelle sa fiu.

²⁰ Ilenge na meng unan kadura in niu nari nmong nmin nanya ninyang, bara in nan lira sa fiu nanya licin nighe.

²¹ Inan yinno imon ille na in di nanye nin nimon ille na in din sue, Tikilus gwana nsu ning, unan katwa nin fiu Kutele, ama bellin minu imon vat.

²² Meng na tughe kiti mine bara nanere, innan yinno ille imon na tuidi nanye, nibinayi mine nan ta sheu.

²³ Lisosin limang udu kiti linuana, nin suu un yinnu sa uyenu unuzu kiti Kutelle Uchiff nin Cikilari Yisa Kristi.

²⁴ Ubolu Kutelle so kiti nalenge na idinin suu Cikilari bite Yisa nin suu sa ligan

Amo New Testament
The New Testament in the Amo language of Nigeria
copyright © 2020 Door43 World Missions Community

Language: Timap (Amo)

Translation by: AFenlason, ALHASSAN SUDA, Chrispher Ishaya, James, Kawusu David, Pungs Makarios, Zephaniah A. Isau, tab04-nig, tab12-nig

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2020-07-06

PDF generated using Haiola and XeLaTeX on 18 Apr 2025 from source files dated 31 Aug 2023

cb0040a9-2597-55c7-975b-461d5a397911